



AVOKATI I POPULLIT

Adresa: Bulevardi: "Zhan D'Ark" Nr.2
Tiranë, Shqipëri



REPUBLIKA E SHQIPËRISË
AVOKATI I POPULLIT
Seksioni i Veçantë

Tel/Fax: +355 4 2380 300/315
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 202002064/4

Tiranë ___/___/2020

Lënda : *Rekomandim për zbatimin me korrektësi të rasteve dhe kritereve ligjore të shoqërimit të shtetasve në ambientet e organeve të Policisë së Shtetit në përputhje me aktet normative në fuqi.*

DREJTORISË SË PËRGJITHSHME TË POLICISË SË SHTETIT
Tiranë

DREJTORISË VENDORE TË POLICISË
Fier

Në institucionin e Avokatit të Popullit ka bërë ankesë shtetasi P.G. me banim në fshatin Dukas të Bashkisë Patos. Ankuesi shkruan se në datën 01.07.2020 ka qënë me makinë së bashku me dy shokë. Në kohën kur ndodheshin në afërsi të banesës së tij ata janë ndaluar nga policia dhe në mënyrë të papritur punonjësit e policisë i kanë drejtuar pistoletat, i kanë arrestuar dhe shoqëruar në Komisarriatin e Policisë Fier. Nga informacionet e marra ai është informuar se arrestimi i tyre është bërë me urdhër të Shefit të Policisë Kriminale vetëm për faktin se makina e tij ishte me targë PE (Peqin), dhe meqenëse policia kishte në ndjekje një grup kriminal nga Peqini, i kanë arrestuar ata në mes të ditës. Ankuesi pretendon se nga ky veprim i policisë atij i është cenuar dinjiteti dhe se sipas tij, punonjësit e policisë mund të kishin bërë verifikimin e tyre duke i ndaluar, kërkuar letërnjoftimet dhe kontrolluar makinën pa i arrestuar e dërguar në komisariat.

Në bazë të kërkesës tonë, Komisarriati i Policisë Fier me shkresën nr. 3182/1 prot., datë 27.07.2020 ndërmjet të tjerave na informoi se, citojmë:

“Në zbatim të ligjit nr. 108/2014 “Për policinë e Shtetit”, ku një ndër misionet e policisë është hetimi dhe zbulimi i veprimtarisë kriminale, është bërë dhe shoqërimi i një mjeti të dyshuar ku brenda tij kanë qënë tre djem të rinj.

Sipas konceptit procedural penal, ndaj personit në fjalë dhe bashkëshoqëruesve të tij nuk është masë ndaluese “Arrest”, por vetëm intervistimi nga ku dhe janë lënë të lirë më pas.

Qëllimi ka qenë puna operative dhe ndjekja me metoda speciale të hetimit të ndonjë veprimtarie kriminale.

Shtetasi P.G. gjatë intervistimit nga O.P.Gj. Ilija Muça, nuk ka shfaqur protestë apo pretendim në lidhje me shoqërimin. Pra pretendimi se nga ana e punonjësve të policisë është nxjerrë arma gjatë shoqërimit, nuk mund të qëndrojë”.

E cituam përgjigjen e dërguar nga Komisariati i Policisë Fier për t’ju bërë me dije se:

Së pari, ndoshta nuk do të ishte etike por ndiejmë detyrimin moral dhe ligjor t’ju bëjmë me dije se, nga leximi i saj kuptohet në mënyrë të qartë dhe pa aspak vështirësi se niveli profesional i konceptimit të saj¹ është larg performancës që duhet të ketë institucioni dhe trupa e Policisë së Shtetit dhe nivelit profesional të “Policisë që duam”.

Nga mënyra e formulimit dhe përmbajtja e saj konstatohet se prej personave në fjalë, të cilët janë me funksione drejtuese në këtë komisarjat që është nga më të rëndësishmit në shkallë vendi nuk njihet ligji nr. 108/2014 “Për Policinë e Shtetit”, i cili është akti normativ bazë që rregullon veprimtarinë e këtij institucioni publik. Nuk njihen konceptet themelore të misionit të këtij organi, parimet e veprimtarisë, kuptimi i termave, i detyrave që kryen ai, të cilat ngatërrohen me njëra-tjetrën, nuk njihen rastet dhe kriteret ligjore të shoqërimit të shtetasve në organin e policisë dhe për rrjedhojë nuk njihen dhe nuk mund të respektohen të drejtat ligjore të shtetasve. Madje duke mos patur formimin e nevojshëm profesional krijohen premisa për të kryer shkelje të të drejtave të shtetasve të garantuara nga Kushtetuta dhe aktet e tjera normative në fuqi.

Ky konstatim nuk duhet të kalojë pa u vlerësuar nga ana juaj, pasi misioni ligjor i Policisë së Shtetit i përcaktuar në nenin 2 të ligjit nr. 108/2014 i cili është: *ruajtja e rendit dhe e sigurisë publike, ruajtja e personaliteteve të larta shtetërore dhe objekteve të rëndësishme të veçantë, garantimi i zbatimit të ligjit, në përputhje me Kushtetutën dhe aktet ndërkombëtare, duke respektuar të drejtat dhe liritë e njeriut.*

Së dyti, nga përgjigjja rezulton gjithashtu se për të realizuar misionin e Policisë së Shtetit, prej dërguesve konsiderohet se është normale që punonjësit e policisë të mund të shoqërojnë në ambientet e këtij organi çdo person, pavarësisht faktit nëse janë rastet dhe kriteret ligjore të shoqërimit të shtetasve. Dhe më keq akoma, se sipas konceptit të tyre në këtë mënyrë dhe metodë pune mund të hetohet dhe zbulohet ndonjë veprimtari kriminale.

Është rasti që të sjellim në vëmendje se e drejta e punonjësve të Policisë së Shtetit për të bërë shoqërimin e shtetasve në mjediset e organeve të policisë, kuptimi, rastet dhe qëllimet e aplikimit të masës së shoqërimit, përgjegjësitë e punonjësve të policisë në rastet e shoqërimit, zbatimi i të drejtave të njeriut dhe siguria për personin e shoqëruar, dokumentimi i shoqërimit në polici dhe rregullat teknike të shoqërimit janë parashikuar

¹ Sqarojmë se shkresa është konceptuar nga Shefi i Seksionit për Krimet Komisar Admir Belishta dhe është nënshkruar nga Shefi i Komisarjatit Komisar Ledio Ibrahim.

në mënyrë shumë të qartë në nenet 6/25², 109³ dhe 122/1⁴, të ligjit “Për Policinë e Shtetit”, si dhe në Procedurën standarde të punës për “Rregullat teknike të shoqërimit në mjediset e Policisë së Shtetit”, miratuar me urdhrin nr. 938 datë 24.07.2019 të Drejtorit të Përgjithshëm të Policisë së Shtetit.

Në Kreun e III-të “Përkufizime”, të Procedurës standarde të punës për “Rregullat teknike të shoqërimit në mjediset e Policisë së Shtetit” parashikohet se:

“Shoqërimi është veprimi administrativ, me karakter detyrues (me ose pa vullnetin e personit që shoqërohet) dhe shtrëngues (qoftë edhe forcërisht), që kryhet nga punonjësi i policisë për dërgimin e shtetasit në ambientet e policisë ose në institucionet e tjera, sipas përcaktimeve dhe procedurave të parashikuara me ligj e aktet nënligjore.”

² Neni 6 “Përkufizime”

Në këtë ligj termat e mëposhtëm kanë këto kuptime:

25. “Shoqërimi” është dërgimi i shtetasit në ambientet e policisë, në institucionet shëndetësore, në qendrat e rehabilitimit, te kujdestari ose personi përgjegjës, në institucionin urdhërdhënës ose në institucionet e tjera me ose pa vullnetin e tij, sipas përcaktimeve të bëra në nenet 109 dhe 122, pika 1, të këtij ligji.

³ Neni 109 “Shoqërimi në polici”

1. Punonjësi i policisë bën shoqërimin e personave në ambientet e Policisë ose institucionin urdhërdhënës në kushtet dhe rastet e mëposhtme:

a) kur është dënuar me burgim nga gjykata kompetente;

b) për moszbatim të urdhrave të ligjshëm të gjykatës ose ndonjë detyrimi të përcaktuar me ligj;

c) kur ka dyshime të arsyeshme se ka kryer veprë penale;

ç) për të parandaluar kryerjen e një veprë penale;

d) kur është larguar pas kryerjes së një veprë penale;

dh) për identifikimin e personit ndaj të cilit zhvillohen hetime, sipas kushteve të përcaktuara në Kodin e Procedurës Penale;

e) për mbikëqyrjen e të miturit për qëllime edukimi ose shoqërimin e tij në organin kompetent;

ë) kur personi është përhapës i një sëmundjeje ngjitëse, i paafte mendërisht dhe i rrezikshëm për shoqërinë;

f) për hyrje të paligjshme në kufirin shtetëror, si dhe në rastet e dëbimit ose ekstradimit.

2. Personi i shoqëruar nuk trajtohet në të njëjtat kushte me personin e ndaluar ose të arrestuar dhe, në çdo rast, shoqërimi duhet të zgjasë deri në sqarimin e çështjes, por jo më shumë se 10 orë.

3. Personi i shoqëruar ka të drejtë të njoftohet menjëherë në gjuhën që ai kupton, për shkaqet e shoqërimit. Ai/ajo duhet të njoftohet se nuk ka asnjë detyrim të bëjë ndonjë deklaratë dhe ka të drejtë të komunikojë menjëherë me një person të besuar dhe avokatit.

4. Efektivi i policisë njofton menjëherë qendrën operative për gjenealitetet e personit të shoqëruar, kur ato njihen, orën e saktë të shoqërimit dhe shkaqet e tij. Të dhënat e komunikuar nga efektivi i policisë hidhen menjëherë në sistemin elektronik të mbajtjes dhe përpunimit të të dhënave. Mosrespektimi nga efektivi i policisë i detyrimeve të përcaktuara në këtë pikë përbën shkelje të rëndë të disiplinës në punë.

5. Punonjësi i policisë, dokumenton në proces-verbal veprimet e kryera me personin e shoqëruar. Procesverbali nënshkruhet në fund të çdo flete nga punonjësi i policisë që ka kryer veprimet dhe personi i shoqëruar. Një kopje e procesverbalit i vihet në dispozicion personit të shoqëruar.

6. Punonjësi i policisë ka detyrimin të njoftojë menjëherë eprorin e vet ose institucionin e interesuar për sqarimin e çështjes. Të dhënat e veprimeve të kryera me personat e shoqëruar dokumentohen gjithashtu në regjistrat/librat që mbahen për këtë qëllim në ambientet e policisë ku është bërë shoqërimi i personit.

7. Për rastet e shoqërimit për hyrje të paligjshme në kufirin shtetëror, për dëbimin ose ekstradimin, procedurat dhe afatet e mbajtjes përcaktohen sipas legjislacionit në fuqi.

8. Rregullat teknike të shoqërimit, evidentimit, mbajtjes dhe trajtimit të personave të shoqëruar në ambientet e policisë përcaktohen nga Drejtori i Policisë së Shtetit.

⁴ Neni 122 “Masat mbrojtëse”

1. Masat mbrojtëse merren ndaj personit të sëmurë mendor, në gjendje të dehur, nën efektet e lëndëve narkotike ose ndaj personit me sëmundje ngjitëse të rënda. Në këto raste, punonjësi i policisë e dërgon personin në ambientet e policisë, në institucionet shëndetësore, në qendrat e rehabilitimit ose e dorëzon te kujdestari apo personat përgjegjës.

Në Kreun e V-të “Rastet dhe qëllimet e aplikimit të shoqërimit” të kësaj Procedure parashikohet se:

“Akti/veprimi i shoqërimit të detyrueshëm si akt i shtrëngimit personal, mund të kryhet vetëm kur ekzistojnë kushtet e rastet e përcaktuara në ligj, si:

- A. Për identifikimin e personit;*
- B. Si masë mbrojtëse;*
- C. Ekzekutimin e një urdhri apo detyrimi të njohur me ligj;*
- D. Sqarimin e një rrethane.”*

Nga përgjigjja e dërguar nga Komisariati i Policisë Fier rezulton se, shoqërimi i shtetasit P.G. në organin e policisë nuk është i bazuar në asnjërin prej rasteve të shoqërimit të shtetasve të parashikuara në dispozitat ligjit “Për Policinë e Shtetit” dhe në Kreun e V-të të Procedurës standarde të punës për “Rregullat teknike të shoqërimit në mjediset e Policisë së Shtetit”, miratuar me urdhrin nr. 938 datë 24.07.2019 të Drejtorit të Përgjithshëm të Policisë së Shtetit.

Nga përmbajtja e 109 të ligjit nr. 108/2014 dhe e Kreut “V” të Procedurës kuptohet se, shoqërimi i një shtetasi duhet të bëhet vetëm nëse ekzistojnë rastet dhe kushtet e përcaktuara në mënyrë shteruese në këto akte normative. Në këto akte nuk parashikohet shoqërimi i mjeteve, sikurse shprehet në përgjigjen e dërguar nga ky komisarjat, *se është bërë shoqërimi i një mjeti të dyshuar ku brenda tij kanë qenë tre djem të rinj*, por i personave të dyshuar Gjithashtu në rastet e shoqërimit të shtetasve nuk parashikohet shoqërimi i tyre *për hetimin e ndonjë veprimtarie kriminale* sikurse është bërë në fakt ndaj ankuesit dhe dy shokëve të tij që ndodheshin me atë. Pra, shoqërimi i tij nuk është bërë për shkak se ndaj tij ka patur dyshime të arsyeshme, se ka kryer vepër penale, për të parandaluar kryerjen e ndonjë vepre penale, si person që është larguar pas kryerjes së një vepre penale, apo si person ndaj të cilit zhvillohen hetime, sipas kushteve të përcaktuara në Kodin e Procedurës Penale. Por edhe nëse ndaj tij do të kishte dyshime të arsyeshme se ka kryer një vepër penale, këto dyshime duhet të mbështeteshin në ekzistencën e një apo e disa të dhënave konkrete, e fakteve dhe e rrethanave objektive, të ndryshme nga supozimet apo hipotezat, sepse ndryshe kalohet në arbitraritet dhe shkelje të rënda të të drejtave të shtetasve.

Mosdisponimi i të dhënave konkrete, i fakteve dhe e rrethanave objektive nga organi apo punonjësit e policisë, provon plotësisht se shoqërimi i shtetasit P.G. në ambientet e Komisarjatisë të Policisë Fier nuk është bërë në përputhje me kriteret ligjore të parashikuara në ligjin dhe në procedurën standarde të punës të cituar më sipër.

Përveç sa parashtruar më lart, gjatë shqyrtimit të këtij rasti konstatoam se nga punonjësi e policisë Ilia Muça me detyrë oficer i policisë gjyqësore, i cili e ka marrë në intervistë të shoqëruar, nuk është përpiluar dhe dhënë ankuesit një kopje e procesverbalit për veprimet e kryera me personin e shoqëruar, sikurse parashikohet në nenin 109/5 të ligjit “Për Policinë e Shtetit” dhe në Kreun VII, pika 1, gërma “f” të Procedurës standarde të punës.

Ndërkohë vlerësojmë se rasti i shoqërimit të shtetasit P.G. në organin e policisë në kundërshtim të hapur dhe të plotë me aktet normative në fuqi nuk duhet të kalonte pa u analizuar dhe nxjerrë përgjegjësitë ndaj punonjësve që kanë kryer shkeljet ligjore, si ndaj atyre që kanë bërë shoqërimin ashtu edhe ndaj atij që ka kryer veprime me të. Strukturat

drejtuese të Komisarariatit të Policisë Fier, sapo u informuan nga institucioni ynë lidhur me këtë rast duhet të vepronin menjëherë për të marrë masat e nevojshme. Kalimi në heshtje i rasteve të tilla është jo vetëm i dëmshëm por edhe me pasoja për të ardhmen për shkak të përsëritjes së tij. Këto shkelje të ligjit nuk cenojnë vetëm të drejtat ligjore të shtetasve të caktuar, por në të njëjtën kohë cenojnë imazhin dhe reputacionin e Policisë së Shtetit në publik.

Përveç sa më sipër vlerësojmë se është rasti që të sjellim në vëmendje shqetësimin e konstatuar që prej disa vitesh nga Avokati i Popullit lidhur me faktin që oficerët e policisë gjyqësore i kryejnë veprimet procedurale me shtetasit në zyrat e tyre të punës. Këto ambiente nuk janë të monitoruara me kamera për vëzhgimin veprimeve procedurale të kryera nga oficerët e policisë gjyqësore.

Lidhur me këtë fakt, Avokati i Popullit në vijimësi i ka rekomanduar organeve të Policisë së Shtetit marrjen e masave për krijimin e zyrave të veçanta ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra, por ky rekomandim nuk është zbatuar ende nga strukturat e Policisë së Shtetit.

Avokati i Popullit, duke iu referuar standardeve ndërkombëtare⁵, e konsideron procesin e monitorimit filmik një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprimeve të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e Policisë së Shtetit.

Avokati i Popullit në përmbushje të misionit ligjor të parashikuar në nenin 2 të ligjit nr. 8454, datë 04.02.1999 “Për Avokatin e Popullit”, i ndryshuar, ***si nxitës i standardeve më të larta të të drejtave dhe lirive të njeriut në vend***, gjykon se bazuar në evidentimin e problematikës të lartpërmendur, lind nevoja e një reagimi më të fortë nga strukturat e Policisë së Shtetit, për të garantuar respektimin dhe mbrojtjen e të drejtave të shtetasve lidhur me rastet dhe kriteret e shoqërimit në ambientet e komisariateve/stacioneve të policisë apo në institucione të tjera në përputhje me aktet normative në fuqi.

Për sa më sipër, bazuar në pikën 3 të nenit 63 të Kushtetutës ku parashikohet se: *“Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike”* dhe në nenin 21/b të ligjit nr. 8454 datë 04.02.1999 “Për Avokatin e Popullit”, i ndryshuar, ku parashikohet se: *“Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”*,

REKOMANDOJMË :

⁵ *“Një sistem i monitorimit të vazhdueshëm i standardeve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkësë të bërë nga i ndaluar gjatë intervistës, si dhe të personave të pranishëm gjatë çdo interviste.” CPT’ reports; Armenia: Visit 2010 [par.18]*

1. Marrjen e masave të nevojshme nga Drejtoria Vendore e Policisë Fier për fillimin e ecurisë disiplinore ndaj punonjësve të Komisarariatit të Policisë Fier të cilët kanë bërë shoqërimin në organin e policisë të shtetasit P.G. në kundërshtim me rastet dhe kriteret ligjore të parashikuara në aktet normative në fuqi.

2. Marrjen e masave të nevojshme nga Drejtoria Vendore e Policisë Fier për fillimin e ecurisë disiplinore ndaj oficerit të policisë gjyqësore Ilia Muça, efektiv i Komisarariatit të Policisë Fier për mos zbatimin e detyrimit ligjor për përpilimin dhe dhënien e një kopjeje të procesverbalit për veprimet e kryera me personin e shoqëruar, sikurse parashikohet në nenin 109/5 të ligjit “Për Policinë e Shtetit” dhe në Kreun e VII-të, pika 1, gërma “f” dhe Kreun e VIII-të, pikat a.3.3 dhe a.3.4 të Procedurës standarde të punës⁶.

3. Marrjen e masave të nevojshme nga Drejtoria e Përgjithshme e Policisë së Shtetit për trajnimin në vijimësi të punonjësve të Policisë së Shtetit lidhur me njohjen e akteve normative që rregullojnë veprimtarinë e këtij organi, rastet dhe kriteret e shoqërimit dhe respektimin e të drejtave ligjore të personave të shoqëruar.

⁶ VII. “Zbatimi i të drejtave të njeriut dhe siguria për personin e shoqëruar”

Në të gjitha rastet e shoqërimeve, punonjësit e policisë janë të detyruar të njohin dhe zbatojnë të drejtat e personave të shoqëruar, si dhe japin siguri për jetën, shëndetin, kushtet e qëndrimit dhe trajtimin human në këto ambiente.

1. Të drejtat e personave të shoqëruar

Personat e shoqëruar kanë këto të drejta që jua njeh ligji:

- a. Të trajtohet në mënyrë humane, njerëzore dhe dinjitoze pa diskriminim për shkak të gjinisë, racës, ngjyrës, besimit, etnisë, bindjeve politike, fetare ose filozofike, orientimit seksual, gjendjes ekonomike, arsimore, sociale ose përkatësisë prindërore;*
- b. Personi i shoqëruar nuk mund të mbahet përtej afatit kohor që nevojitet për sqarimin e pozitës dhe çështjes, në çdo rast zbatohen përcaktimet e pikës “V” të kësaj procedure;*
- c. Personi i shoqëruar ka të drejtë që të njihet menjëherë me arsyet e shkaqet e shoqërimit;*
- d. Nuk ka detyrim të bëjë ndonjë deklaratë;*
- e. Të komunikojë me një person të besuar, avokat apo mbrojtësin ligjor;*
- f. T’i vihet në dispozicion një kopje e procesverbalit të veprimeve të kryera me të shoqëruarin;*

VIII. “Procedura të dokumentimit të veprimit të shoqërimit”

Akti/veprimi i shoqërimit, detyrimisht, evidencohet e dokumentohet në sistem elektronik, në regjistra, në formularë dhe procesverbale.

Procedurat e evidentimit të veprimeve që janë kryer me të shoqëruarin kryhet nga punonjësi i policisë që ka punuar dhe sqaruar çështjen, ndërsa hedhja e të dhënave në regjistrë dhe në sistemin elektronik të të dhënave kryhen nga punonjësi i policisë të shërbimit të informacionit në njësinë policore.

Mos zbatimi i kësaj kërkesë nga personat përgjegjës për dokumentimin e aktit të shoqërimit, përbën shkelje të rëndë disiplinore.

a.3 - Proces verbali i veprimeve të kryera me personin e shoqëruar:

a.3.1 - Pas kryerjes së veprimeve të verifikimit e sqarimit të rastit për personin e shoqëruar, nga punonjësi i policisë hartohet procesverbali i dokumentimit të veprimeve të kryera me personin e shoqëruar.

a.3.2 - Ky procesverbal pasi plotësohet duke hedhur të gjithë të dhënat sipas përcaktimeve dhe rubrikave të përcaktuara në të, nënshkruhet në fund të çdo faqeje nga punonjësi i policisë që ka kryer veprimet dhe nga vetë personi i shoqëruar.

a.3.3 - Proces verbali i veprimeve të kryera me personin e shoqëruar plotësohet nga punonjësi i policisë që është ngarkuar të kryejë verifikimin dhe trajtimin e çështjes përkatëse për personin e shoqëruar.

a.3.4 - Procesverbali hartohet në dy kopje, një kopje e procesverbalit i jepet detyrimisht personit të shoqëruar dhe kopja tjetër dorëzohet në sekretari/arshivën e njësisë policore.

Mos plotësimi i procesverbalit dhe mos dhënia e një kopjeje personit të shoqëruar përbën shkelje të rëndë dhe ndëshkohet sipas përcaktimeve të bëra në Rregulloren e Policisë.

4. Marrjen e masave të menjëhershme nga Drejtoria e Përgjithshme e Policisë së Shtetit për përgjithësimin e këtij rasti në strukturat vendore të Policisë së Shtetit me qëllim që shkelje të tilla të mos përsëriten në të ardhmen.

Për qëndrimin që do të mbani dhe masat që do të merrni në zbatim të këtij rekomandimi, të vihemi në dijeni brenda afatit 30 ditor, parashikuar nga neni 22 i ligjit nr. 8454, datë 04.02.1999 “Për Avokatin e Popullit”, i ndryshuar.

Duke besuar në mirëkuptimin dhe bashkëpunimin tuaj,

KOMISIONERI

Ermonela Ruspi

Konceptoi: S. Nushi